


唐玄宗御製道德真經序

昔在元聖強著玄言權輿真宗啟迪來裔遺文誠在  
精義頗垂撮其指歸雖蜀嚴而猶病摘其章句自河  
公而成略其餘浸微固不足數則我玄宗妙旨其將  
墮朕誠寡薄嘗感斯文猥承有後之慶恐夫無為之  
理每因清宴輒叩玄關隨所意得遂為箋注豈成一  
家之說但備遺闕之文今茲絕筆是詢於衆公卿臣  
庶道釋二門有能起予類於卜商鍼疾同於左氏渴  
於納善朕所虛懷苟副斯言必加厚賞且如諛臣自  
聖幸非此流縣市相矜亦云小道既其不諱咸可直



言勿為來者所嗤以重朕之不德  
唐元宗御註道德真經卷之一

道經上

道可道章第一

道可道非常道名可名非常名

道者虛極之妙用名者物得之所僱用可於物故  
云可道名生於用故云可名應用且无方則非常  
於一道物殊而名異則非常於一名是則強名曰  
道而道常无名也

无名天地之始有名萬物之母

無名者妙本也妙本見氣權輿天地天地資始故  
云無名有名者應用也應用匠成茂養萬物物得  
其養故有名也

常無欲以現其妙常有欲以現其徼

人生而靜天之性感物而動性之欲若常守清靜  
解心釋神返照正性則現乎妙本矣若不正性其  
情至欲而動性失於欲迷乎道原欲現妙本則見  
邊徼矣

此兩者同出而異名

如上兩者皆本於道故云同也動出應用隨用立

名則名異矣

同謂之玄

出則名異同則謂玄玄深妙也  
玄之又玄衆妙之門

意因不生則同乎玄妙猶恐執玄為滯不至兼忘  
故寄又玄以道玄示明无欲於无欲能如此者萬  
法由之而自出故云衆妙之門

天下皆知章第二

天下皆知美之為美斯惡已皆知善之為善斯不善  
已

美善者生於欲心心苟所欲雖惡而美善矣故云  
皆知以已之所美為美所善為善矣美善无主  
俱是妄情皆由封執有无分別難易神奇臭腐  
以相傾奪大聖較量深知虛妄故云惡已  
故有無之相生難易之相成長短之相形高下之相  
傾奇声之相和前後之相隨

六者相違逆為名稱亦如美惡非自性生是由妄  
情有此多故

是以聖人處无為之事行不言之教

无為之事无事也寄以事名故云處不言之教忘

言也寄以教名故云行也

萬物作而不辭

令萬物各自得其動作而不辭謝於聖人也  
生而不有為而不情功成不居

令萬物各遂其生不為已有各得所為而不負持  
如此即太平之功成矣猶當日慎一日不敢寧居  
也

夫唯不居是以不去

夫唯不敢寧居而增修其德者則忘功而功存  
故不居而不去也

不尚賢章第三

不尚賢使民不爭

尚賢則者迹徇迹則爭興使賢不肖各當其分  
則不爭矣

不貴難得之貨使民不為盜

難得之貨謂性分所死者求不可得故云難得夫  
不安本分希效所死既失性分寧非盜竊欲使物  
任其性事稱其能則難得之貨不貴性命之情不  
為盜矣

不見可欲使心不乱

既无尚賢之迹不求难得之貨是无可見之欲而心不惑乱也

是以聖人之治虛其心

心不為可欲所乱則虛矣

寔其腹

道德內充則无矜徇亦如屬厭而止不生貪求弱其志

心虛則志弱

強其骨

腹寔則骨強

常使民無知无欲

常使民无争尚之知无貪求之欲也

使夫知者不敢為也

清静化人盡无知欲商有知者令不敢為也

為无為則无不治矣

於為无為人得其性則淳化有孚矣

#### 道冲章第四

道冲而用之或似不盈

言道動出冲和之氣而用生成有生成之道曾不

盈滿云或似者於道不敢正言

淵兮似萬物之宗

淵深靜也道常生物而不盈滿妙本淵兮深靜故似為萬物宗主

挫其銳解其紛

道以沖和故能抑止銛利釋散紛擾若俗學求復則彌結矣

和其光同其塵

道无不在所在常无在光在塵皆与為一一光塵爾而妙本非光塵也

湛兮似或存

和光同塵而妙本不雜故湛兮似有所存

吾不知其誰之子象帝之先

吾不知道所從生明道非生法故无父道者似在乎帝先爾帝者生物之主象似也

### 天地章第五

天地不仁以萬物為刍狗聖人不仁以百姓為刍狗不仁者不為人思也刍狗者結芻為狗也犬以守禦則有蔽蓋之恩今芻狗徒有狗形而无警吠之用故无情於仁愛也言天地視人亦如人視芻狗无貴望爾嘗試論之曰天至仁无親孰為兼愛

則不至道是偏私不独親其親則天下皆親矣不獨子其子則天下皆子矣是則至仁之无親乃至親也豈兼愛乎

天下之間其猶橐籥乎

橐籥者籥也籥者笛也橐之鼓風笛之運吹皆以虚而无心故能動而有應則天地之間生物无私者亦以虚而无心故也

虚而不屈動而愈出

橐籥虚之而不屈撓動之而愈出声以况聖人心无偏愛則无屈撓之時應用不穷可謂動而愈

出也

多言教穷不如守中

多言而不訓故教被穷屈兼愛則難偏便致怨憎故不如抱守中和自然皆足

谷神章第六

谷神不死

谷者虚而能應者也神者妙而不則者也死者休息也谷之應声莫知所以有感則應其應如神如神之應曾不休息欲明至道虚而生物妙用難名故舉谷神以為喻說

是謂玄牝

玄深也。牝母也。谷神應物，沖用無方，深妙不窮，能  
母萬物，故寄谷神。玄牝之號，將明大道生畜之功。  
玄牝之門，是謂天地根。

深妙虛牝，能母萬物，萬物由出，是謂之門。天地有  
形，故資稟為根本矣。

絃、若存用之不勤

虛牝之用，絃、微妙應用，若存其用，无心，故不勤  
勞矣。

天長地久章第七

天長地久

標天地長久者，欲明无私，无心，則能長，能久，結喻  
成義，在乎聖人後身，外身，无私，成私，爾。

天地所以能長且久者，以其不自生，故能長生。

天地生物，德用甚多，而能長且久者，以其資稟於  
道，不自矜其生成之功，故爾。

是以聖人後其生，而身先，外其身，而身存。

後身，則人樂推，故身先，外身，則心忘，淡泊，故身  
存。

非以其無私邪，故能成其私。



天地忘生養之功是无私而能長且久長成其私  
聖人後外其身是无私而能先能存是成其  
私也

上善若水章第八

上善若水

將明至人上善之功故舉水性發道之喻

水善利萬物而不爭處衆人之所惡故發於

道也近

君善地

上善之人處身柔弱亦如水之居地潤益切

地以卑用水好下流

心善淵

用心深靜亦如水之淵停矣

與善仁

施與合乎至仁亦如水之滋潤品物也

言善信

發言信實亦如水之行險不失其信矣

改善治

從改善治亦如水之洗滌群物令其清靜

矣

事善能

於善事能周任亦如水性方圓隨器不滯於物矣

動善時

物感而應不失其時亦如水之春泮冬凝矣

夫惟不爭故無尤

上善之人虛心順物如彼水性壅止決流既不違迂於物故无尤過之地

持而盈之章第九

持而盈之不如其已

執持盈滿使不傾失積財為累悔吝必生故不如其已已止也

揣而銳之不可長保

揣度銳利進取榮名富貴必驕坐招殃役故不可長保

金玉滿堂莫之能守

此明盈難久持也

富貴而驕自遺其咎

此明銳不可揣也驕猶心生故咎非佗与

功成名遂身退天之道

功成名遂者當退身以辭盛亦如天道虛盈  
有時則无夏惠矣

載營魄章第十

載營魄抱一能无離乎

人生始化曰魄既生日魂魄則陰虛魂則陽滿  
宮人載虛魄常須營護復陽、氣充魄則  
為魂、能運動則生全矣一者不雜也復  
陽全生不可染雜故今抱守淳一能无離  
身乎

專氣致柔能如嬰兒乎

專一沖氣使致和柔能如嬰兒无所分別

滌除玄覽能无疵乎

玄覽心照也疵瑕病也滌除心照使令清淨能  
无瑕病

愛民治國能无為乎

愛養萬人臨理國政能无為乎當自化矣自  
上營魄皆教修身身修則德全故可為君矣  
天門開闔能為雌乎

天門曆數所從出開闔謂治乱言人君應

期受命能守雌靜則可以永終天祿矣又解  
云易曰一闔一闢謂之變言聖人撫運應變  
无常不以雄成而守雌北亦如天門開闔虧  
而盈益謙也

明白四達能无知乎

人君能為雌靜則萬姓樂推其德明白如日四  
照猶須忘功不宰故云能无知乎

生之畜之生而不有為而不恃長而不宰是  
謂玄德

令物各遂其生而畜養之遂生而不以為有

修為而不恃其功居長而不為主宰人君能如  
此者是謂深玄之德矣

三十輻章第十一

三十輻共一轂當其元有車之用

此明有无功用相資而立三十輻者明造車  
也共一轂者因信少總衆夫轆箱之有共則  
成車車中空无乃可運用若无轆箱之有  
亦无所用之車車中若不空无則轆箱之  
有皆為棄物

埏埴以為器當其无有器之用

埏和也埴土也陶匠和土為瓦缶之器  
鑿戶牖以為室當其无有室之用

古者陶穴以為室宇亦開戶牖故云鑿爾  
故有之以為利无之以為用

有體利无以无為利无體用有以有為用且  
形而上者曰道形而下者曰器將明至道之  
用約形質以彰故借羸有之利无以明妙无  
之用有爾

五色章第十二

五色令人目盲五音令人耳聾令人口爽

目悅青黃之觀耳耽宮徵之音口嚙芻豢之味

傷當過分則坐令形骸聾盲

馳聘田獵令人心發狂

馳聘代務耽著有為如彼田獵唯求殺獲日以心

鬪逐境奔馳靜而思之是發狂病

難得之貨令人行妨

性分所无求亦不得妄求難得故令道行有所妨  
傷也

是以聖人為復不為目故去彼取此  
取此舍受之腹去彼妄視之目

寵辱章第十三

寵辱若驚

操之則慄捨之則悲未忘寵辱故皆驚也

貴大患若身

身為患本貴矜貴其身即如貴大患矣此合云貴身如貴大患而乃云貴大患如身者欲明起心貴身即是大患有貴即身是大患故云貴大患如身若如也此上兩句正標

何謂寵辱寵為下

前標云寵辱如驚恐人不了故問何謂寵辱夫得

寵驕盈无不生禍是知寵為辱本故答云寵為下矣

得之若驚夫之若驚是謂寵辱若驚

寵辱循還寵為辱本凡情感滯驚辱而不驚寵故聖人戒云汝之得寵當如汝得辱而驚則汝之失寵得辱亦如吾戒汝得寵而驚懼也故結云是謂寵辱若驚

何謂貴大患若身

恐人不曉即身是患本故問之吾所以有大患者為吾有身

身相虛幻本无真實為患本者以吾執有其身  
痛癢寒温故為身患

及吾无身吾有何患

能知天地委和皆非我有離形去智了身非身  
同於大通夫有何患

故貴以身為天下若可寄天下愛以身為天下若  
可託天下

此章首標寵辱之戒後以寄託結成者寵辱  
若驚未忘寵辱貴愛以為未忘貴愛故以辱  
枝寵則辱不如寵以貴方愛則貴不如愛驚寵

辱者尚有寵辱介懷存貴愛者未為兼忘天  
下故初則使驚寵如辱後欲令寵辱俱忘假  
寄託之近名辯兼忘之極致忘身寵辱則无  
所復驚忘身則无為患本忘天下則无寄託  
之近名

視之不見名曰夷

視之不見名曰夷

此明道也夷平易也道非色故視不可見以其  
於无色之中而能色焉故名曰夷

聽之不聞名曰希

希者聲之微也道非聲故聽之不聞以其於无聲之中独能和焉故名曰希

搏之不得名曰微

搏執持也微妙也道无形故執持不得以其於无形之中而能形焉故名曰微

此三者不可致詰故復混而為一

三者將以詰道道非声色形法故詰不可得但得夷希微爾道非夷希微故復混而為一

其上不皦其下不昧

在上者必明在下者必昧唯道於上非上在上亦

不明於下非下在下亦不昧也

繩：不可名復歸於无物

繩：者運動不絕之意不皦不昧運動无窮生物之功名目不得非物能物故常生物而未始有物妙本湛然故云復歸於无物

是謂无状之状无物之象是謂惚恍

是謂无形状之状无物質之象不可名有不可名无无有難名故謂之惚恍

迎之不見其首隨之不見其後

无始故迎之不見其首无終故隨之不見



其後

執古之道以御今之有

執古無為之道以御今有為之事則還遠淳樸矣

能知古始是謂道紀

能知古始所行是謂道化之紀綱

古之善為士章第十五

古之善為士者微妙玄通深不可識

士事也言古之善以道為事者於彼微言妙道无不立鑒通照而德容深邃不可識知

夫唯不可識故強為之容

夫唯德量難識故強為容狀以明之謂下文

豫若冬涉川

豫閑豫也善士於代閑法如涉冬川眾人貪著故畏懼今我不染故閑豫也

猶若畏四鄰

猶豫疑難也上言善士不染故閑豫及現行事甚疑難如今代人懼鄰戒

儼若客渙若冰將釋

雖則儼然若客无所造為而不凝滯於物渙然若

春冰之釋散也

敦兮其若樸

雖渙然水釋曾不目矜而能敦厚若質樸无所  
分別

曠兮其若谷

其德量曠然寬廣无所舍容若彼空谷

渾兮其若濁

和光混迹若濁而清

孰能濁以靜之徐清

孰誰也誰能於彼渾濁以靜澄止之令徐自

清乎

孰能安以久動之徐生

誰能安靜於此清以久更求勝法運動修行  
令清靜之性不滯於法而徐動出也生猶動  
出也

保此道者不欲盈

欲保此徐清徐生之道當須无所執滯若  
執清求生是謂盈滿將失此道故云不欲  
盈

夫唯不盈故能弊不新成

夫唯不盈滿之人故能以新證之行為獎薄不以其新成而滯著也

致虛極章第十六

致虛極守靜篤

虛極著妙本也言人受生皆稟虛極妙本及形有受納則妙本離散今欲令虛極妙本必致於身當須絕棄虛境染滯守此雌靜篤厚則虛極之道自致於身也

萬物並作吾以觀其復

老君云何以知守雌靜則能致虛極乎但觀萬物

動作云為及其歸復常在於靜故知爾  
夫物芸：各後歸其根

又云所以知萬物歸復常在於靜者為物華葉芸：生性皆復歸於其根本故有作云云者動作也言夫物云云動作者及其歸復皆在根本爾

曰歸旅曰靜靜曰復命

華叶云：者生惟歸根則靜止矣人能歸根至靜可謂復所稟之性命

復命曰常知常曰明

守靜復命可謂有常知守常者更益明了  
不知常妄作出

不恒其德或成之蓋失常妄作劣凶心至矣  
知常容

知守真常則心境虛靜如彼空谷無不包容  
容乃公

含容應物應物无心既无私邪故為公正  
公乃王

能公正无私者則為物所歸往  
王乃天

羣物樂推如天之覆則與天合德  
天乃道

王德如天乃能行道  
道乃久

道行天下乃可以久享福作矣  
歿身不殆

同天行道則終歿其身長无危殆之事矣

太上章第十七

太上知有之

太上者淳古之君下知者臣下知上有君尊之如

天而无施教有为之迹故人无德而稱焉  
其次親之譽之

建德下哀君行善教仁見故親之功高故譽之  
其次畏之侮之

德又下哀君多弊政人不堪命則驅以刑罰故畏  
之懷情相欺明不能察故侮之

信不足有不信

畏之侮之者皆由君信不足故令下有不信之人  
猶其貴言

親之譽之者由君有德教之言故貴其言而

親譽之

功成事遂百姓謂我自然

功成而不執事遂而无為百姓日用而不知謂我  
自然而成遂則太上知有之之謂也

大道廢章第十八

大道廢有仁義

澆淳散樸大道不行曰仁與義小成遂作濡沫生  
於不足凋弊起於有為然則聖人救代之心未嘗  
異而夷儉之迹不得一系

智慧出有大偽

用智慧者將立法也法出而姦生則有大偽矣并  
竊符璽可不信然

六親不和有孝慈

父子夫婦兄弟六親也疏戚无倫不和也各親各  
子有孝慈也皆由失道故有偏名也  
國家昏亂有忠臣

太平之時上下交足何異名乎昏亂之日見危致  
命有忠臣矣

絕聖棄智章第十九

絕聖棄智民利百倍

絕聖人言教之迹則化无為棄凡夫智詐之用則  
人淳樸淳樸則巧偽不作无為則矜徇不行人抱  
天和物无天枉是有百倍之利

絕仁棄義民復孝慈

絕兼愛之仁棄裁非之義則人復於大孝慈矣

絕巧棄利盜賊无有

人矜偏能之功必有爭利之心故絕巧則人不爭  
棄利則人自足足則不為盜賊矣

此三者以為文不足故令有所屬

此三者但令絕棄未示修行故以為文不足垂



教更令有所屬著謂下文也

見素抱積少私寡欲

見真素抱淳樸少私邪寡貪欲

唐玄宗御註道德真經卷之二  
道經下

絕學无憂  
章第二十

絕有為俗學則淳樸不敢少私寡欲故无憂也  
唯之与阿相去幾何善之与惡相去何若

唯則恭應阿則慢應同出於口故云相去幾何  
而恭應則善慢應則惡以喻俗學絕之則无憂  
不絕則生患只在心識回照豈復相去遠哉  
人之所畏不可不畏



凡人所畏者慢与惡也善士所畏者俗學與有為也皆當絕之故不可不畏

荒兮其未央哉

若不畏絕俗學則衆生正性荒廢其未有央止之時

衆人熙熙如享大年如登春臺

衆人俗學有為熙熙逐境如臨享大年春臺望登動生貪欲

我独怕兮其未央如嬰兒之未孩

我独怕然安靜于其情欲略元形兆如彼嬰兒未

能孩孺也

棄棄兮若无所歸

至人无心運動随物无所取与若行者之无所歸棄棄運動貌

衆人皆有餘

耽嗜塵務矜誇巧智自為有餘以示光大而我独若遺

常若不足有所遺忘

我愚人之心也哉純純兮

我豈愚人之心遺忘若此也哉但我心純純故若

遺爾

俗人昭昭

矜巧智也

我独若昏

自韜晦也

俗人察察

立法制也

我独悶悶

唯寬大也

忽若晦寂兮似无所止

容貌忽然若昏晦而心寂兮絕於俗學似无所

止著

衆人皆有以

衆人於代間皆有所以逐境俗學之意

我獨頑似鄙

頑者无分別鄙者陋不足而心實了悟外若不足

故云似爾

我獨異於人

人有情欲我无愛染人与道反我與道同

而貴求食於我

求食於母者貴如嬰兒无營欲爾上文云如嬰兒之未孩下經云含德之厚比於赤子如此所以獨異於人先无求於兩字今所加也且聖人說經本无避諱今代為教則有嫌疑暢理故義不可移臨大則句須穩便便今存故是所庶幾又司馬遷云老子說五千餘言則明理詣而息言不必以五千為定格

孔德之容章第二十一

孔德之容唯道是從

孔甚也從順也設問甚有德之人容狀若何言此



道之為物唯恍唯忽

此明孔德所從之道不有不无冲用唯各故云

恍惚

惚兮恍其中有象

惚无也恍有也兆見曰象自元而降有其中兆

見一切物象

恍兮惚其中有物

物者即上道之為物也自有而歸无還復至道故云其中有物也

杳兮冥其中有精

惚恍有无杳冥不測生成之用精妙甚存

其精甚真其中有信

杳冥之精本元假雜物感必應應用不差故云

有信

自古及今其名不去

言道自古及今生成萬物物得道用因用立

名生成之用既今古是同應用之名故古今

不去

以閱衆甫

閱度闕也甫本始也言至道應用度闕衆物本

始各遂生成之用也

吾何以知衆甫之然哉以此

以此令萬物皆稟道妙用生成故爾

曲則全章第二十二

曲則全

曲已以應務則全

枉則直

枉已以中人則直

窪則盈

執謙德則常盈

弊則新

守弊薄則日新

少則得

抱一不離則无失

多則惑

有為多門則惑亂

是以聖人抱一為天下式

聖人抱守淳一故可以為天下法式

不自見故明

人不自見其德常曲己以應務則其德全  
自明

不自是故彰

人能不自以為是而在己以申人則其是直自  
彰矣

不自伐故有功

人能不自伐取則其功歸己矣

不自矜故長

人能長守弊薄不自矜街則人樂推其長  
夫唯不爭故天下莫能與之爭

不與物爭誰與爭者此言天下賢與不肖无能與不爭者爭也

古之所謂曲則全者豈虛言哉誠全而歸之古有曲全之言豈虛妄哉定能曲者則必全理而歸之

希言自然章第二十三

希言自然

希言者妄言也不云妄言而云希者明因言以詮道不可都忘悟道則言忘故云希爾若能因言悟道不滯於言則合自然

飄風不終朝驟雨不終日

風雨飄驟則暴卒而害物言教執滯則失道而生迷

孰為此者天地天地尚不能久而況於人乎

天地至大欲為暴卒則傷於物尚不能久以況於人執言滯教則害於道欲求了悟其可得乎

故從事於道者

故從事於道之人當不執滯言教道者同於道

體道者悟道忘言則同於道矣

德者同於德

德者道用之名人能體道忘功則其所施爲同於道用矣

失者同於失

執言滯教元由了悟不悟則遠道自同於失矣同於道者道亦得之同於德者德亦得之同於失者失亦得之

方諸挹水陽燧引火類族辯物斷焉可知信不足有不信

執言滯教不能了悟是於信不足也自同於失失亦樂來是有不信也

跂者不立章第二十四

跂者不立跨者不行

跂舉踵而望也跨以跨挾物也以喻白見求明明終不得何異夫跂求久立跨求行履乎

自見者不明

露才揚已動而見无故不明

自是者不勤

是已非人直爲怨府故不勤

自伐者无功

專固伐取物所不與故无功

自矜者不長

矜街行能人所鄙薄故不長

其於道也曰餘食贅行物或惡之故有道者不處

自見等行於道而論是曰殘餘之食疣贅之行

凡物尚或惡之故有道之人不處斯事矣

有物混成章第二十五

有物混成先天地生

將欲明道立明之由故云有物言有物混然而成

含柔一切柔其生化乃在天地之先

寂兮寥兮獨立而不改周行而不殆可以為天下母

有物之體寂寥虛靜妙本湛然常寂故獨立而不

改應用徧於羣有故周行而不危殆而萬物資以

生成被其茂養之德故可以為天下母

吾不知其名字之曰道強為之名曰大

吾見有物生成隱元名氏故以通生表其德字之

曰道以色舍目其體強名曰大

大曰逝逝曰遠遠曰返

妙用先方強名不得故自大而求之則逝而往矣



自往而求之則遠不及矣若能了悟則返在於身心而證之矣

故道大天大地大王亦大

因其所大而明之得一者天地王也天大能覆地大能者王大能法地則天行道故云亦大也

域中有四大而王居其一焉

王者人靈之主萬物繫其興亡將欲申其鑒戒故云而王居其一欲警王令有所法謂下文也

人法地地法天天法道道法自然

人謂王也為生者先當法地安靜既爾又當法天

運用生成既生成已又當法道清淨無為令物

自化人君能爾者即合道法自然之性

重為輕根靜為躁君

重者制輕故重為根靜者持操故靜為君

是以君子終日行不離輜重

輜重車也重者所載之物也輕躁者貴重靜亦由行者之守輜重故失輜重則遭凍餒好輕躁則生禍亂

雖有榮觀燕處超然

人君者守重靜故雖有榮觀當須燕而爾安處超然不顧也

奈何萬垂之主而以身輕天下

奈何者爲嘆之辭也天下者大宝之位也言人君奈何以身從欲輕用其身令亡其位也

輕則失且躁則失君

君輕易則人離散故失且且躁求則主不齒故失君

善行章第二十七

善行无轍迹

於諸法中體不真性行无行相故云善行如此則心与道冥故无轍迹可尋求

善言无瑕謫

能了言教不為滯執遣象求意理證言忘故於言教中无瑕疵謫過

善計不用籌筭

能了諸法本元二門一以貫之不生他見故無勞籌筭自能照了既无計筭非善而何

善聞无閑捷而不可閉

魚忘言行不入異門心无邊境之迷境无起心之

累雖无閔捷其可開乎

善結无繩納而不可解

體了真性本以虛忘若能虛忘則心与道合雖无繩索約束其可解而散乎

是以聖人常善救人故无棄人常善救物故无棄物是以聖人常用此五善之教以教之故无棄者

是謂襲明

密用曰襲五善之行在於忘遺忘遺則无迹故云

密用密用則悟了故謂之明

故善人不善人之師不善人善人之資

師法也資取也善人可師法不善人可取役使也

不貴其師不愛其資

此章深旨教以魚忘若存師資未為極致今明所以貴師為存學相學相既空自无所貴所以愛資為存教相於教忘教故不愛資貴愛兩忘而道自化

雖知大迷是為要妙

師資兩忘是謂玄德凡俗不悟以為大迷故聖人云雖知凡俗以為大迷以道觀之是為要妙

知其雄章第二十八

知其雄守其雌為天下谿為天下谿常德不離復歸於嬰兒

雄者患於用牡故知其雄則當守其雌謙德物歸是為天下谿谷則真常之德不離其身抱道含和復歸於嬰兒之行矣

知其白守其黑為天下式為天下式常德不忒復歸於无極

能守雌靜常德不離德雖明白當如暗昧如此則為天下法式常德應用曾不差忒德用不穷故復

歸於无極忒差也

知其榮守其辱為天下谷為天下谷常德乃足復歸於樸

德雖尊榮常守卑辱物感斯應如谷報声虛受不穷常德圓足則復歸於道矣樸道也

樸散則為器聖人用之則為官長

舍德內融則復歸於樸常德應用則散而為器既涉形器必有精麤聖人用之則為羣材之官長矣

故大制不割

聖人用道大制羣生暄然似春蒙澤不謝動植  
咸遂曾不割傷

將欲章第二十九

將欲取天下而為之吾見其不得已

天下者大宝之位也有道之者必待曆數在躬  
若暴亂之人將欲以力取而為之主者老君戒  
云吾見其不得已

天下神器不可為也為者敗之

大宝之位是天地神明之器謂為神器故不可以  
力為也故曰為者敗之此戒姦亂之臣

執者失之

曆數在躬已得君位而欲執有斯位凌虐神主天  
道禍淫亦當令失之此戒帝王也

故物或行或隨或煦或吹或強或羸或載或墮

欲明為則敗執則失故物或行之於前或隨之於  
後或煦之使暖或吹之使寒扶之則強抑之則弱  
有道則載事无德則墮廢

是以聖人去甚去奢云矣

爾 聖人觀或物之行隨知執者之必失故去其過分

以道佐人主章第三十

以道佐人主者不以兵強天下其事好還

人臣能以道輔佐人主者當柔服以德不用甲兵之威取強於天下何則兵者凶器戰者危事抗兵加使後心應之其事既好還報則勝負之數未可量也

師之所處荆棘生焉大軍之後必有凶年

軍師所處戰則妨農農事不修故生荆棘兵氣感害水旱繼之農廢於前災隨其後必有凶荒之年

故善者果而已不敢以取強果而勿矜果而勿伐果而勿驕

善輔相者果於止敵蓋在於安人和衆必不敢求勝取強故難果於止敵敵不為寇慎勿矜功伐取以自驕盈驕則敗亡故為深戒

果而不得已是果而勿強

前敵來侵不得休止故用兵以止之如是則果在於應敵非果以取強也

物壯則老是謂不道不道早已

物之用壯由兵之恃強物壯則衰兵強則敗是謂

不合于道當須早止不為

夫佳兵章第三十一

夫佳兵者不祥之器物成、惡之故有道者不處  
住者好也兵者謀略也凡人修辭立誠不能以道  
德藏器而以兵謀韜略為好謀略之用只在於攻  
取殺伐故為不善之材器凡物尚或惡之是以有  
道之人不處身於此爾

君子居則貴左用兵則貴右

左陽也陽和則發生故平居所貴右陰也陰凝則  
肅殺故用兵所貴

兵者不祥之器

祥善也好兵者尚殺故為不善之材器也

非君子之器

君子以道德為材器不貴兵謀

不得已而用之恬淡為上

夷狄內侵故不得已善勝不爭是恬淡為上

勝而不美而美之者是樂殺人天樂殺人者不可得  
志於天下

制勝於敵必哀其人故不以為美也天勝必多殺  
人若以勝為美者是樂多殺人樂多殺人人必不附

欲求得之不亦難乎

言事尚左凶事尚右偏將軍處左上將軍處右

偏將軍卑而處左者不專殺人上將軍尊而處右者主兵謀也

言以喪禮處之

喪禮尚右今上將軍居右者是以喪禮處置之

殺人衆多以悲哀泣之

以生靈之貴而交戰殺之有惻隱之心故以悲哀傷泣之爾

戰勝則以喪禮處之

勇士雄入戰而獲勝勝則受爵居於右位尚右非吉是以喪禮處之但以為不祥之器亦何必縞素為資

道常无名章第三十二

道常无名

道以應用為常常能應物其應非一故於常无名

樸雖小天下不敢臣

樸妙本也妙本精一故云小而應用匪成則至大也故无敢以道為臣者



侯王若能守萬物將自賓

侯王若能守道精一无為而化則萬物將自賓服矣

天地相合以降甘露人莫之令而自均

侯王若能抱守精一則地平天成交泰致和故降洒甘露夫甘露既降蕭蘭俱澤不煩教令而自均平取譬侯王稱物平施

始制有名名亦既有

人君以道致平始能制御有名之物故有名之物亦盡為侯王所有矣既盡也

夫亦將知止知止所以不殆

若侯王能制有名之物則天有名之物亦將知依止於侯王知依止有道之君所以无危殆之事

譬道之在天下猶川谷之与江海

天降甘露以瑞有道故譬有道之君在宥天下天則應之猶如川谷与江海通流爾

知人者智章第三十三

知人者智自知者明

智者後用以知物明者融照以鑒微智則有所不知明則无所不照

勝人者有力自勝者強

能制勝人者適可謂有力能自勝其心使柔弱者不可全其強爾

知足者富強行者有志

知止足者无貪求可謂富矣強力行者不懈怠可謂有志節矣

不失其所者久

知足強力不失其所恒則是久於其道者

死而不亡者壽

死者分理之終亡者天枉之數壽者一期之盡夫

知人勝人必招殃咎知足強力動得天常得天常者死而不亡是一期之盡可謂壽矣

大道汎兮章第三十四

大道汎兮其可左右

大道汎兮无繫而能應物左右无所偏名矣

萬物恃之以生而不辞功成不名有

言萬物恃賴冲用而生化而道不乱以為勞功用備成不名己有

愛養萬物而不為主常无欲可名於小

愛養羣材而不為主宰於物无欲則可名於小言

不可名小

萬物歸之不為主可名於大

愛養之故萬物歸之有萬不同而不為主可名為

大非小非夫所以難名

是以聖人終不為大故能成其大

是以聖人法道忘功終不自為光大故能成其光

大之業

執大象章第三十五

執大象天下往

大象大道也帝王執持大道以理天下則天下萬

物歸往矣

往而不害安平泰

物往而不傷害則安於平泰

樂與餌過客止

樂音樂也餌飲食也言人家有音樂飲食則行過之客皆為之留止如帝王執道以致平泰亦為萬物所歸往矣又解云樂以声聚餌以味聚過客少留非久長也是以蘧廬不可以久處仁義觀之而多貴故人君礼道清淨淡然无味始除察察之政終化淳淳之人故下文結云用不可既也

道之出口淡乎其无味

人君以道德清淨為教初出於口淡乎其无味不似俗中言教有親譽畏侮等也

視之不可見聽之不足聞用之不可既

以道鎮淨初无言教故視之不足見聽之不足聞而淳風大行萬物殷阜歲計有餘故用不可既

盡也

將欲歛之章第三十六

將欲歛之必固張之將欲歛弱之必固強之將欲廢之必固興之將欲奪之必固與之是謂微明

經云正言若反易云與以行權、反經而合義者也故君子行權貴於合義小人用之則為詐譎孔子曰可與立未可與權信矣故老君前章云執大象斯謂之實此章繼以歛張是謂之權欲量衆生根性故以權寔覆却相明令必致於性命之域而惑者乃云非道德之意何其迷而不悟哉故將欲歛歛衆生情欲則先聞張極其侈心令自困於愛欲則當歛歛矣強弱等義略与此同此道甚微而効則明著故云是謂微明

柔弱勝剛強

嬰順可以行權、行則能制物故知柔弱者必勝於剛強矣

魚不可脫於淵國之利器不可以示人

脫失也利器權道也此言權道不可以示非美人故舉喻云魚若失淵則為人所擒權道示非其人則當密以為詐譎矣

道常無為章第三十七

道常無為而無不為侯王若能守萬物將自化

妙本清淨故常無為物時以生而無不為也侯王若能守道無為則萬物自化君之無為而淳樸矣

化而欲作吾將鎮之以無名之樸

言人既從君上之化已無為清淨而復欲動作有為者吾將以無名之樸而鎮靜之元名之樸道也

無名之樸亦將不欲不欲以靜天下將自正

言人君既以無名之樸鎮靜蒼生不可執此無名之樸而令有迹將恐尋迹喪本復入有為故於此無名之樸亦將兼忘不欲於無欲無欲亦亡洵然清靜而天下自正平矣

唐玄宗御註道德真經卷之三

德經上

上德不德章第三十八

上德不德是以有德下德不失德是以元德

德者道之用也莊子曰物得以生謂之德時有淳醜故德有上下上古淳樸德用不彰元德可稱故云不德而淳德不散無為化清故云是以有德建德下哀功用稍著心雖體道迹涉有為執德可稱故云不失迹涉矜有比上為羸故云是以無德也上德無為而無以為

知無為而無為者非至也無以無為而無為者至矣故上德之無為非徇無為之美但舍孕淳樸適自無為故云而無以為此心迹俱無為也

下德為之而有以為  
下德為之者謂心雖無為以功用彰著而迹涉有為故云為之言下德無為而有所以為此心無為而迹有為也

上仁為之而無以為  
仁者兼愛之名下德衰而上仁見所以為兼愛之仁故云為之行仁而忘仁迹欲求無為故云而無

以為此則心有為而迹無為也且上仁稱無為者  
擬迹無為而方上義爾未可以語下德之有為也  
上義為之而有以為

義者裁非之義謂為裁非之義故曰為之有以裁  
非斷割令得其宜故云而有以為此心迹俱有為也

上禮為之而莫之應則攘臂而仍之  
六紀不和則為禮以救之故曰為之禮尚往來不  
來非禮行禮於彼而彼不應則攘臂而怒以相仍  
引也

故失道而後德失德而後仁失仁而後義失義而後禮

失道者失上德也上德合道故云失道夫道德仁義者時俗夷險之名也故道衰而德見德衰而仁存仁亡而義立義喪而禮救斯皆適時之用爾故論禮於淳樸之代非狂則悖忘禮於澆醜之日非愚則誣若能解而更張者當退禮而行義退義而行仁退仁而行德忘德而合道人反淳樸則上德之無為也夫禮者忠信之薄而亂之首

制禮者為忠信衰薄而以禮為救亂之首爾用禮者在安上理人豈玉帛云乎哉前識者道之華而愚之始

識者人之性識也謂在人性識之前而制此檢外之禮雖欲應時實喪淳樸故云道之華禮以救亂所貴同和而失禮意者則將矜其玉帛貴其拜跪如此之人故為愚昧之始

是以大丈夫處其厚不處其薄居其實不居其華有為者道之薄禮義者德之華故聖人處無為之事其厚也不處其薄矣退禮義之行其華也



自居其寔矣

故云彼取此

去彼華薄取此厚寔

昔之得一章第三十九

昔之得一者

一者道之和謂冲氣也以其妙用在物為一故謂之一爾

天得一以清地得一以寧神得一以靈谷得一以盈萬物得一以生侯王得一以為天下正其致之

物得道用因用立名道在則名立用夫而實喪矣

故天清地寧神靈谷盈皆資妙用以致之故云其致之

天無以清將恐裂地無以寧將恐發神無以靈將恐歇谷無以盈將恐竭萬物無以生將恐滅侯王無以貴高將恐蹙

得一者不可矜其用故誠云天無以其清而矜之將恐分裂地無以其寧而矜之將恐發泄神矜則靈歇谷矜則盈竭物矜則生滅侯王矜其貴則將顛蹙矣聖教垂代本為靈生雖遠舉天地之清寧而會歸只在於侯王守雌用道爾故下文云

故貴以賤為本高以下為基

侯王貴高兆名賤不為國者以人為本基當勞謙以聚之令樂其愷悌之化不有離散

是以侯王自謂孤寡不穀此其以賤為本邪非乎

孤寡不穀則凡情所惡侯王自稱以謙為本非乎者明是以賤為本爾

故致教與無與

數典則無與輪轉為與本數貴則無貴賤下為貴本轉為與本當存轉以定與賤為貴本當守賤以安貴將戒侯王以賤為本故致此教與之談也

不欲琢：如玉落：如石

琢：玉貌落：石貌以賤為本

反者道之動章第四十

反者道之動

此明權也反者取其反經合義反經合義者是聖人之行權行權者是道之運動故云反者道之動也

弱者道之用

此明實也弱者取其柔弱雌靜柔弱雌靜者是聖人處實處實者是道之常用故云弱者道之用

也

天下之物生於有有生於無

天實之於權猶無之生有故行權者貴反於寔用  
有者必資於無然至道冲寂離於名稱諸法性空  
不相因待若能兩忘權實泯有無教與無與可  
謂超出矣

上士聞道章第四十一

上士聞道勤而用之

了悟故勤行

中士聞道若存若亡

中士可上可下故疑疑則若存若亡

下士聞道大笑之

迷而不信故笑

不笑不足以為道

不為下士所笑不足以為玄妙至道

建言有之

建言也將欲立言明此三士於道不同

明道若昧進道若退夷道若類

上士勤行於明若昧於進若退於夷若類故中士  
疑而下士大笑之

上德若谷

虛緣而容物

大白若辱

純潔而含垢

廣德若不足

大成而執謙也

建德若偷

立功而不銜

質真若渝

淳一而和光

大方無隅

不小立圭角

大器晚成

且無近功

大音希聲

不飾小言說

大象無形

故能應萬類也

道隱無名

功用不彰無名氏



夫唯道善貸且成

雖隱無名氏而實善以沖和妙用資貸萬物且成  
熟之

道生一章第四十二

道生一一生二二生三

一者沖氣也言道動出沖和妙氣於生物之理未足又生陽氣陽氣不能獨生又生陰氣積沖氣之一故云一生二積陽氣之二故云二生三也

三生萬物

陰陽含孕沖氣調和然後萬物阜成故云三生

萬物

萬物負陰而抱陽沖氣以為和

萬物得陰陽沖氣生成之故故負抱陰陽含養沖氣以為柔和也

人之所惡唯孤寡不穀而王公以為稱

萬物皆以沖和之氣為本而沖氣和柔守本者當須謹卑柔弱故王公至尊而稱孤寡不穀者以謙柔為本故也

故物或損之而益益之而損

自損者人益之自益者人損之

人之所教亦我義教之

老君云人君所欲立教教人者當以吾此柔弱謙卑之義教之

強梁者不得其死

強梁之人動與物亢求益而損物成繫之故不得其死

吾將以為教父

吾見強梁者亡柔弱者全故以柔弱之教為眾教之父也

天下之至柔章第四十三

天下之至柔馳騁天下之至堅

天下之至柔者正性也若馳騁代務染雜塵境情欲充塞則為天下之至堅

無有入於無聞吾是以知無為之有益

無有者不染塵境令心中一無所有無間者道性清淨妙礼混成一無間隙夫不為可欲所乱令心境俱靜一無所有則心与道合入無間矣故聖人云吾見身心清淨則能合道是知有為之教不如無為之有益爾

不言之教無為之益天下希及之

言天下衆教少能及之者

名與身孰親章第四十四

名者實之賓

代之人徇名以亡身設問誰親欲令去功与名而全其真爾

身与貨孰多

徇名者將以求財得而亡身設問孰多欲令擲玉毀珠以全其和

得与亡孰病

問得名貨与亡名貨孰者病其身

是故甚愛必大費多藏心厚亡

甚愛名者必勞神非大費乎多藏貨者必累身非厚亡乎

知足不辱知止不始可以長久

知足者不甚愛知止者不多藏既無辱始故可長久

大成若缺章第四十五

大成若缺其用不弊

學行大成常如玷缺謙則受益故其材用無困弊之時

大盈若沖其用不窮

祿位盈滿常若沖虛儉不傷財故所用不窮

大直若屈

直而不肆故若屈

大巧若拙

巧不傷於分外故若拙

大辯若訥

不備小說故若訥

躁勝寒靜勝熱清淨為天下正

於躁勝者則寒寒薄也於靜勝者則熱熱和也故

若屈者大直清靜為正矣

天下有道章第四十六

天下有道却走馬以糞

天下有道之主無為化行既不貪求故無交戰屏

却走馬之事人得奠除田園

天下無道戎馬生於郊

天下無道之君縱欲攻取故兵戎士馬寄生於郊

境之上矣

罪莫大於可欲

見可欲為罪大矣



禍莫大於不知足

求取不已爲禍大矣

咎莫大於欲得

欲咎之大莫大於欲于欲必令皆得皆得則福深

故云咎也

故知足之足常足矣

物足者非知足心足者乃知足心若知足此足則

常足矣

不出戶章第四十七

不出戶知天下不窺牖見天道

垂拱無爲不出教令於戶外是知理天下之道人

事和則天象順故不煩窺牖而天道可知

其出彌遠其知彌少

若不能無爲假使出令彌遠其知理天下之道彌

少

是以聖人不行而知

不出戶故云不行無爲淳朴而知爲理之道

不見而名

不窺牖故云不見人和天順而能名其太平

不爲而成

不為義而天下化成

為學日益章第四十八

為學日益為道日損

為學者日益見問為道者日損功行益見聞為修學之漸損功行為悟道之門是故因益以積功忘功而體道矣

損之又損之以至于無為無為而無不為

為學者積功行為道者忘損之雖損功行尚有欲損之心兼忘此心則至於泊然無為方彼鏡象而無不應故無不為也

取天下常以無事

無為無事天下歸懷故可取天下

及其有事不足以取天下

有事則煩勞煩勞則凋弊故不足以取天下

聖人無常心章第四十九

聖人無常心以百姓心為心

聖人之心物感而應應在於感故無常心心雖無常唯在化善是常以化百姓心為心

善者吾善之不善者吾亦善之德善信者吾信之不信者吾亦信之德信

欲善信者吾因而善信之不善信者吾亦以善信教之令百姓感吾德而善信之

聖人在天下慄慄為天下渾其心

聖人在理天下化引百姓常慄慄用心令德善信而聖心凝寂德照圓明渾同用心皆為天下故云為天下渾其心

百姓皆注其耳目

百姓化聖德為善故傾注耳目以觀聽聖人

聖人皆孩之

聖人念彼蒼生猶如慈母故凡視百姓皆如嬰兒

出生入死章第五十

出生入死

了悟則出生迷執則入死正標也

生之徒十有三死之徒十有三

汎論衆生當生安生得生理處死順死得死理如此者大凡十中有三人爾

人之生動之死地十有三

徇生太厚以養傷生既心於此生故動往死地此則生理既失死理亦虧如此之輩十中有三人爾

夫何故以其生生之厚

設問所以動之死地夫緣何故但以其求生此生  
太厚之故

蓋聞善攝生者陸行不遇兕虎入軍不被甲兵兕無  
所投其角虎無所措其爪兵無所容其刃

善攝衛生理之人心照清靜無貪取之意則凡是  
外物不可加害陸行不求遇兕虎入軍不被帶甲  
兵此不求害物也則物無害心故無投角措爪容  
刃之所矣

夫何故以其無死地

天何故兕虎甲兵無容措之所乎以其順化無  
私不以死為死則物不得害其生故云無死地  
也

道生之章第五十一

道生之

妙本動用降和氣

德畜之

物得以生養萬類

物形之

乾知坤作北形位

勢成之

寒暑之勢各成遂

是以萬物莫不尊道而貴德

萬物由道德以生畜故尊貴之

道之尊德之貴夫莫之爵而常自然

言道德之尊貴非假爵命但生成之功被物而常

自然貴爾

故道生之畜之長之育之成之熟之養之覆之

是以人莫不尊道而貴德也

生而不有為而不恃長而不宰是謂玄德

具如載營魄章所釋彼章言人修知道此章明道  
用同人

天下有始章第五十二

天下有始以爲天下母

始者沖氣也言此妙氣生成萬物有茂養之德故

可以爲天下母

既得其母以知其子

萬物既得沖和茂養以知其身即是沖氣之子

既知其子復守其母沒身不殆

既知身是沖氣之子當守此沖和妙氣不令離散

則終沒其身長無危殆也

塞其兌閉其門終身不勤

兌愛悅也目悅色耳悅聲六根各有所悅縱則生  
患是故塞之不縱六根愛悅則禍患之門閉矣故  
終身不勤勞矣

開其兌濟其事終身不救

開張六根縱其視聽以成濟其愛悅之事則常有禍  
患故終身之不救爾

見小曰明

人能於事微小則見而改行可謂明

守柔曰強

守柔弱則人不能加可謂強矣

用其光復歸其明

見小則明守柔則強若矜明用強將失守柔見  
小之義故當用光外照復歸守內明長無患累  
矣

無遺身殃是謂襲帝

遺與也言還守內明則無與身為殃咎者如此是  
謂密用真帝之道

使我介然章第五十三

使我介然有知行於大道唯施甚畏

老君言若使我取介然於其有知欲行大道既與道不合故唯所施為是皆可畏

大道甚夷民甚好往

大道平易是畏有知而人多故欲心求捷如彼行人好從邪徑邪徑之變具如下文

朝甚除

尚賢務智生巧偽除理也

田甚蕪

浮食墮業廢農事

倉甚虛

南畝不收無儲積

服文采

刻雕綺綉害工利

帶利劍

文德不修尚武備

厭飲食

烹肥擊鮮重滋味厭飫足

財貨有餘

聚歛積寔饒珍異

是謂盜誇非道也哉

矜其有知動以成獎行同盜竊仍自矜誇誇盜非道適令興歎也哉者歎辭

善建不拔章第五十四

善建者不拔

善能以道建因立本者不可傾拔也

善抱者不脫

善能以道懷抱百姓者不可脫離

子孫祭祀不輟

言善以道德建抱之君功施於後受其甘棠況其

子孫乎而王者祖有功宗有德故周之興也始於后稷成於文武周之祭也郊祀后稷宗祀文王故雖卜代三十卜年七百毀廟之主流蓋於外而后稷文王郊宗之祀不輟也

修之身其德乃真

修道於身德乃真純

修之家其德乃餘

一家盡修德乃餘美

修之鄉其德乃長

一鄉盡修德乃長久



修之國其德乃豐

一國盡修德乃豐盈

修之天下其德乃普

若天下盡修其德施乃周普矣

故以身觀身

以修身之法觀身能清靜者真

以家觀家

以修家之法觀家能和睦者有餘

以鄉觀鄉

以修鄉之法觀鄉能順序者乃長

以國觀國

以修國之法觀國能勤儉者乃豐

以天下現天下

以修天下之法現天下能無為者乃普

吾何以知天下之然哉以此

以此現身等現之則可知爾

舍德之厚章第五十五

舍德之厚比於赤子

至人舍懷道德之厚者其行比於赤子

毒蟲不螫猛獸不據攫鳥不搏

至人神矣物不能傷既无害物之心故無螫搏之地此至人之舍德也

骨弱筋柔而屋固未知牝牡之合而峻作精之至終日號而不嗷和之至

赤子骨弱筋柔而能握拳牢固未知陰陽配合而舍氣之源動作者猶精粹之至終日啼號而聲不嘶嗷猶純和之至此赤子之全和也

知和曰常

能如嬰兒固守和柔是謂知常之行

知常曰明

守和知常是曰明了

益生曰祥

祥者吉也之兆言人不知守常而求益生越分動之死地是曰凶祥

心使氣曰強

心有是非氣無分別若役心使氣是曰強梁之人

物壯則老是謂不道不道早已

凡物壯極則衰老故戒云矜壯持強是謂不合于道當須早已

知者不言章第五十六

知者不言言者不知

知了悟也言辯說也

塞其兌

了悟者於法無愛染於言無執滯故云塞其兌也

閉其門

既無愛染則嗜欲之門閉矣

挫其銳解其紛和其光同其塵是謂玄同

解其如道冲章彼則約道此則約人言人能體道

是謂与玄同德也

故不可德而親

玄同無私故不可得而親

不可得而踈

汎然和衆故不可得而踈

不可得而利

無欲故不可得而利

不可得而害

不爭故不可得而害也

不可得而貴

體道自然故不可得而貴

不可得而賤

洗然無滓故不可得而賤也

故為天下貴

體了無滯言忘理暢銳紛盡解光塵六同既難親  
踈不可貴賤故為天下至貴矣

以政治國章第五十七

以政治國以奇用兵以無事取天下

在宥天下貴乎無為為政若以政教理國奇詐用  
兵斯皆不合於道唯無事無為可以取天下此三

句標也

吾何以知天下其然哉以此

以此下文知之

天下多忌諱而民彌貧

以政理國動多忌諱人失作業故令彌貧也

人多利器國家滋昏

利器謂權謀人主以權謀為多不能反實下則應  
之詐譎故令國家滋益昏亂

人多伎巧奇物滋起

人主以伎巧為多不能見素下則應之以奢泰故

令淫奇之物滋起也

法令滋彰盜賊多有

無為既失法令益明竄法為姦盡成盜賊豈非多有子

故聖人云我無為而民自化我無事而民自富我好靜而民自正我無欲而民自樸

無為則清靜故人自化無事則不擾故人自富好靜則性故人自正無欲則全和故人自樸此無事取天下矣

其政悶悶章第五十八

其政悶悶其民淳淳

政教悶悶無為寬大人則應之淳淳然而質朴矣

其政察察其民缺缺

政教察察有為苛急人則應之缺缺然而門弊矣

禍兮福所倚福兮禍所伏孰知其極

倚因也伏藏也上言其政悶悶俗則以為無政理之體人反淳淳然而質樸此則禍為福之所因也其政察察而俗則以為有政理之術人乃缺缺然而

淵矣此福為禍之所藏

其無政邪正復為奇善復為祆

禍福之極豈無正邪但衆生迷執正者復以為奇詐善者復以為祆祥故禍福倚伏若無正爾

民之迷其日固久

以正為奇以善為祆如此迷倒其為日也固以久矣

是以聖人方而不割廉而不剝直而不肆光而不耀

聖人善化不割彼而為方不剝彼而為廉不申彼

而為直不耀彼而為光修之身而天下自化矣肆中也

治人事天章第五十九

治人事天莫若嗇

嗇愛也人君將欲理人事天之道莫若愛費使倉廩實人知禮節三時不害則天降之嘉祥人和可以理人天保可以事天矣

夫唯嗇是謂早服

何以聚人曰財故能儉愛則四方之人將襁負而至早服事其君矣服事也

早服謂之重積德

夫唯儉嗇以是有德人歸有德早事其君故云重積德

重積德則無不克

聖人積德四海歸仁則無有不能制服者矣克能也

無不克則莫知其極

人君之德無有不能制御者則無遠不至故四方莫知其旁極也

莫知其極可以有國

莫知其旁極然後可以為有國  
有國之母可以長久

有國而茂養百姓者則其國福祚可以長久矣  
是謂深根固蒂長生久視之道

積德有國則根深花蒂固矣深固者有國長生久視之道

唐玄宗御註道德真經卷之四  
德經下

治大國章第六十

治大國若烹小鮮  
烹小鮮者不可撓治大國者不可煩煩則人勞撓  
則魚爛矣

以道莅天下其鬼不神

以道臨莅天下不求有妾之福故鬼無以見其神  
明

非其鬼不神其神不傷民



上言其鬼不神非謂鬼歿滅而無神但有其神而不見神恠以傷民也

非其神不傷民聖人亦不傷民

鬼見神恠則傷民聖人有為則傷民今鬼所以不見神恠而傷民者蓋以聖人無為清靜故爾

夫兩不相傷故德交歸焉

鬼神傷民則害國虧本聖人傷民則墮神乏祀今兩不相傷物故德交歸焉

大國者下流章第六十一

大國者下流天下之交

下流者謙德也大國當下流開納則天下之人交至矣

天下之交牝牝常以靜勝牡以靜為下

天下之人交至者歸於謙德則如牝以雌靜常為牡動所求由以靜為下故

故大國以下小國則取小國小國以下大國則取大國

大取小以為臣妾小取大以為援助

故或下以取或下而取

以者大取小而者小取大

大國不過欲兼畜人小國不過欲入事人

大國執謙德而下小國者不過欲兼畜小國為臣  
妾小國賀貴賦以下大國者不過欲入事大國為  
援助也

兩者各得其所欲故大者宜為下

一求且妾二求援助是兩者各求得其所欲然大  
國者常戒於滿盈故特云大者宜為下

道者萬物之奧章第六十二

道者萬物之奧

萬物皆資妙本以生成是萬物取給之所故與言

云為萬物之奧與內也

善人之室

善人知守道者昌失道者亡故當室貴之而無患  
累也

不善人之所保

保住也不善之人不能室貴至道及有患難即欲  
以身保住於道自求免爾

美言可以市尊行可以加人

甘美其言可以求市尊高其行可以加人以况聖  
人以甘美法味之言尊高清靜之行以化不善之

人亦如市賈之售相率而從善矣故下文云也  
人之不善何弃之有

不善之人亦在化之而已何弃遺之有  
故立天子置三公

共教不善之人

雖有拱壁以充駟馬不如坐進此道

三公輔佐雖以合拱之壁先導駟乘之馬以獻之  
猶不如坐進此無為之道於君以化人尔

古之所以貴此道者何

何問辭也

不日求以得有罪以免耶故為天下貴

道在於悟不在於求不如財帛故可日日求而得  
之故云不日求以得既悟則自無罪累豈待有罪  
方求免也可以為天下貴

為無為章第六十三

為無為事無事味無味大小多少報怨以德

於為無為于事無事於味無味者假令大之与小  
多之與少既不越分則無与為怨若遂境生心違  
分傷性則無大無小皆為怨對今既守分全和故  
是報怨以德

固难于其易為大于其細

肆情縱欲者于為無不難于事無不大今欲圖度其難營為其大當須於性未散而心未越則是于其易細也

天下難事必作于易天下大事必作于細

明上文所以預固為也

是以聖人終不為大故能成其大

因云大事必作于細將明聖人所以能成其大者以不為其難事大事故能成其尊大耳夫輕諾必寡信多易必多難

輕諾詐人必寡于信動作多易後必多難

是以聖人猶難之故終無難

難為輕諾多易故終無難大之事

其安易持章第六十四

其安易持其未兆易謀

言人正性安靜之時將欲執持令不敢亂故雖欲起心尚未形兆謀度絕之使令不起並甚易耳

其脆易破其微易散

欲心初染尚自危脆能絕之者脆則易破禍患

初起形兆尚微將欲防之微則易散耳  
為之于未有

覆上易持易謀也所以易者為營為之于未有形  
兆耳

治之于未亂

覆上易破易散也所以易者為理之于未成禍亂  
耳

合抱之木生于毫末九層之臺起于累土千里之行  
始于足下

此三者喻其不早良圖使後成患

為者敗之執者失之

凡情不能因任營為分外為者求逐理必敗之於  
事不能忘遺動成執着執着求得理必失之

是以聖人無為故無敗無執故無失民之從事常于  
箴戒而敗之

民之始從事于善者當于近成而自敗之  
慎終如始則無敗事

慎其終未常如始從善之心則必無禍敗之事  
是以聖人欲不欲不貴難得之貨

難得之貨為性分可無者今聖人於欲不欲不營

為于分外故常全其自然之性是不貴難得之貨

學不學復衆人之所過以輔萬物之自然而不敢為

聖人不求過分之孝是于學不學將以歸復衆人過分之學以輔其自然之性不敢為俗學与多欲也

古之善為道章第六十五

古之善為道者非以民將以愚之

人君為善道者非以其道明示於民將導之以和

使歸復于朴令如愚耳

民之難治以其智多

君將明道以臨下下必役智以應上智多則詐與是以難治

是故以智治國國之賊

以用也又君任用多智之臣使令治國智多必作法法作則奸生故是國之賊也

不以智治國國之福

若不用巧智之臣但取純德之士使偃息蕃醜弄丸解難自然智詐日薄淳樸日興人和年豐故是

國之福也

知此兩者亦稽式

役智詐則害於人任淳德則福于國人君能知此兩者委任淳德之臣是以為君稽模法式

常知稽式是謂玄德

人君常知所委任是謂深玄至德矣

玄德深矣遠矣與物反矣然後乃至大順

玄德深遠能与物反歸復其本令物乃至大順于自然之性也

江海為百谷王章第六十六

王 江海所以能為百谷王者以其善下之故能為百谷

之故百川朝宗矣

是以聖人欲上人以其言下之欲先人以其身後之

是以處上而人不重處前而人不害  
謙為德柄尊用彌光以言謙下之百姓欣戴故處  
其上而人不以為重以身退後之百姓子來故處  
其前而人不以為害也

是以天下樂推而不厭

以是不重不害之故故天下之人樂推崇為之主而不厭倦

以其不爭故天下莫能与之爭

聖人謙退不与物爭天下共推誰與爭者

天下皆謂我道第六十七

天下皆謂我道大似不肖

肖似也老君云天下之人皆謂我道大無所象似我則答云耳

夫唯大故似不肖若肖久矣其細也夫

夫唯我道至大故無所象似若如代聞諸法有所

象似則不得稱大久已微細也夫  
我有三宝保而持之

我道雖大無所象似然有此三行甚可珍貴能常保倚執持可以理身理國也

一曰慈二曰儉三曰不敢為天下先

慈則廣救儉則足用不敢為天下先故樂推而不

厭

夫慈故能勇

慈人敏惠則德有餘故勇於救濟也

儉故能廣



節儉愛費財用有餘故施益廣

不敢為天下先故能成器長

慈儉之德謙焉益光推先與人必不厭故能成  
神器之長

今捨其慈且勇捨其儉且廣捨其後且先死矣

今捨慈且勇勇則害物捨儉且廣廣則傷財捨後  
且先先則人怨傷財害物聚怨於人是必死之道  
故云死矣

夫慈以戰則勝以守則固

用慈以戰利在全衆用慈以守利在安人各保安

全故能勝固耳

天將救之以慈衛

以慈戰守豈但人和天道孔明亦明救衛戰勝天  
救也守固天衛也是皆以慈故故云天將救之以  
慈衛之

善為士章第六十八

善為士者不武

士事也善以道為理國之事者尚德故云不武

善戰者不怒

事不得已必須應敵以慈則善故不憑怒

善勝敵者不爭

師克在和則善勝全勝之善故不交爭

善用人者為之下

悅以使人令盡其力必先下之是為善用

是謂不爭之德是謂用人之力是謂配天古之極也

善勝是不爭之德為下是用人之能力如此者可以配天稱帝是古之至極要道也

用兵有言章第六十九

用兵有言

老君傷時輕殘人於兵故託古以陳戒有言者謂下句

吾不敢為主而為客不敢進寸而退尺

主有動作則生事而貪客無營為則以慈自守自

守則全勝生事則敗亡進雖少不能無事退雖多

不失謙讓故不敢進於寸而退於尺

是謂行無行

為客退尺不與物爭雖行應敵與無行同矣

攘無臂

攘臂所以表怒善戰不怒故若無臂可攘

仍無敵

仍引也引敵者欲爭不爭故若無敵可引

執無兵

執兵所以表殺今以慈和為主故雖執兵與無兵同

禍莫大於輕敵輕敵者於喪吾室

為禍之大莫大於輕侮敵人輕侮敵人者則殆喪吾以慈之室

故抗兵相加哀者勝矣

抗舉也兩國舉兵以相加則慈哀於人者勝之

吾言甚易知章第七十

吾言甚易知甚易行

老君云吾所說言契理故易知簡事故易行

天下莫能知莫能行

天下之人滯言而不悟煩事而不約故莫能知莫能行

言有宗事有君

言者在理、得而言忘故言以無言為宗事者在功功成而不宰故事以無事為君也

夫唯無知是以不我知

CENTRAL

國立中央圖書館

ROC

國立中央圖書館, NATIONAL CENTRAL LIBRARY, TAIWAN, R.O.C.

夫唯代人無了悟之知是以不知我無言無事之教

知我者希則我者貴

了知我忘知之意者希少法則我不言之教者至貴

是以聖人被褐懷玉

被褐者晦其外懷玉者明其內故知我者希少耳

知不知上章第七十一

知不知上不知知病

了法性空本非知法於知忘知是德之上不知知法本性是空於知強知是行之病

夫唯病病是以不病

夫唯能病能知之病是以不為強知所病也

聖人不病以其病病是以不病

唯聖人所以不病病者以其病衆生強知之病是以不病

人不畏威章第七十二

人不畏威則大威至

有威而可畏謂之威言人於小不畏拙于慎微則

至於大可畏也

無狹其所居

神所居者心也無狹者除情去欲使虛而生白無厭其所生

身所生者神也無厭者少思寡欲使不勞倦

夫唯不厭是以不厭

夫唯人不厭神是以神亦不厭人

是以聖人自知不自見自愛不自貴

自知其身防可畏之事自愛其身無厭神之咎不自見其能以犯患不自貴其身以聚怨也

故去彼取此

去彼見貴取此知愛

勇於敢章第七十三

勇于敢則殺勇于不敢則活

敢謂果敢言人勇于果敢從事則失于謙柔退讓必害于身故云則殺不敢者則可以活身矣

知此兩者或利或利害天之所惡孰知其故

兩者敢与不敢也或有也能知不敢者有利敢者有害當須勇于不敢此勇敢之人動有災害乃天之所惡孰能知其故哉

是以聖人猶難之

聖人猶難為勇敢之事

天子道不爭而善勝

此下言天道謙虛以戒人事勇敢天不与物爭四時盈虛物無違者故善於勝

不言而善應

天何言哉福善禍淫曾無差忒故云善應

不召而自來

天道不召物使從己物不能違自來順天耳  
緘然而善謀

天道玄遠緘然寬大垂象示人可則之故云善謀

天網恢恢疎而不失也

天之網羅雖恢：疎遠刑淫賞善毫分不失

民常不畏章第七十四

民常不畏死柰何以死懼之

縱放情欲動之死地習以為常嘗無畏者人君當以清靜化之柰何更立刑法以誅殺恐懼之

若使人常畏死而為奇者吾得則而殺之孰敢

若使代人皆從清靜之化不敢溺情縱欲常畏于

死而獨為奇詐者假令吾勢得執敢此奇詐之人孰敢即殺故下文云

常有司殺者殺

如此奇詐之人天網不失是常有天之司殺者殺之也

夫代司殺者殺是謂代大匠斲

人君好自執殺必不得天理是猶拙夫代大匠斲不

夫代大匠斲希有不傷其手矣

拙夫代斲豈但傷材亦自傷其手人君任用刑法

代彼司殺豈唯殘害百姓抑亦自喪天和也

民之飢章第七十五

民之飢以其上食稅之多是以飢

天下之民所以飢之不足者以其君上食用賦稅之太多故耳

民之難治以其上之有為是以難治

天下之民所以難治化者以其君上之有為有為則多難多難則詐興是以難治

民之輕死以其求生之厚是以輕死

天下之人所以輕其死者以其違分求生太厚之

故是以輕死

夫唯無以生為者是賢於貴生

自然之分定則生全若養過其分分過則生亡矣  
故夫唯無以厚其生為者是賢於矜貴其生

民之生章第七十六

民之生也柔弱其死也堅強萬物草木生也柔脆其  
死也枯槁故堅強者死之後柔弱者生之徒

生之柔弱和氣全也死之堅強和氣散也欲明守

柔弱者全生保年為強梁者亡身失性

是以兵強則不勝

見哀者勝故知恃強者必敗

木強則共

木本強大故處于下枝條柔弱共生于上蓋取其

柔弱者在上強梁者在下故下文云

強大處下柔弱處上

天之道章第七十七

天之道其猶張弓乎

天道玄遠非喻不明故舉張弓以彰其用耳

高者抑之下者舉之有餘有損之不足者与之

張弓如此乃能命中是猶天道虧盈益謙欲命人



君法天字人故示抑高舉之道

天之道損有餘補不足人之道則不然損不足以奉有餘

天道平于哀多益寡人則違天翻損不足

孰能以有餘奉天下唯有道者

誰能以己之有餘奉与天下之不足者乎獨有道者能耳

是以聖人為而不恃

聖人法天稱物均施施平于物而不恃其功

功成不處

CENTRAL

國家圖書館, NATIONAL CENTRAL LIBRARY, TAIWAN, R.O.C.

ROC

推功于物不處其成  
其不欲見賢

聖人所以推功不處者蓋不欲令物見其賢能

天下柔弱章第七十八

天下柔弱莫過于水而功堅強者莫之能勝其無以易之

以堅功堅必兩堅俱損柔制強者則強損而柔全故用攻堅強者無以易于水者矣

故柔勝剛弱勝強天莫不知莫能行

柔弱之道勝于剛強天下之人無不知者知有此

道不能行也

是以聖人言受國之垢是謂社稷主受國不祥是謂天下王

引萬方之罪是受國之垢濁稱孤寡不穀是受國之不祥其德如此則社稷有奉故天下之人歸往矣

正言若反

受國之垢為社稷主受國不祥為天下王是必正言初若反俗故云正言若反

和大怨章第七十九

和大怨

與身為怨對之大者情欲也和謂調和也言人君欲以言教調和百姓使無情欲故曰和大怨

必有餘怨

主教化人不能無迹斯迹之弊還與為怨故曰必有餘怨

安可以為善

既有餘怨則不可以為善

是以聖人執左契而不責於人

左契者心也心為陽藏與前境契合故謂之左契

耳聖人知立教則必有迹有迹即是餘怨故執持此心使令清靜下人化之則無情欲不煩誅責自契無為

故有德司契無德司徹

司主也徹通也言有德之君主司心契則人自化無德之主則將立法以通于人為法之弊故未為善

天道無親常与善人

司契則清靜立法則凋殘皇天無親唯德是輔故人君者常思淳化于無為不可立法而生事

小国寡民章第八十

小国寡民使有什伯之器而不用

什件也伯長也此章明人君舍其淳和無所求及適有人材器堪為什件伯長者亦無所用之矣

使民重死而不遠徙

少思寡欲不輕用其生敦本無求不遠遷徙

雖有舟輿無所乘之雖有甲兵無所陳之使民復結繩而用之矣

舟輿所以利遷徙甲兵所以徇攻戰兩者無欲故無所乘陳返朴還淳復歸于三皇結繩之用矣

甘其食

不食嗑味故所食常甘

美其服

不事文繡故所服皆美

安其居

不飾棟宇故所居則安矣

樂其俗

不澆淳朴故其俗可樂也

鄰國相望雞犬之音相聞

言其近也

民至老死不相往來

彼此俱足無求之至

信言不美章第八十一

信言不美

信言者聖教也信實也言不韵于俗故不美

美言不信

美言者代教也甘美之言動合于俗故不信

善者不辯

善者在行無辯說

辯者不善

CENTRAL

NATIONAL CENTRAL LIBRARY, TAIWAN, R.O.C.

ROC

空滯辯說故不善

知者不善博博者不知

知者多悟也博者多聞也

聖人不積

積者執言滯教有所積聚也聖人了言忘言悟教遺教一無執滯故云不積

既以與人已愈有既以與人已愈多

此明法性無盡言聖人雖不積滯言教然以法味誘導凡愚盡以與人於聖人清靜之性曾無減耗唯益明了故云愈有愈多有明白性多明外益

天之道利而不害聖人之道為而不爭

舉天道利物不害者將明聖人之道施為弘益常以與人故不爭也